

Ծառահատների բրիգադը նստեց հանգստանալու: Ոչ թե առանձին-առանձին, ամեն մեկն իր տեղամասում, այլ բոլորը միասին, խմբված: Այդպես էր պահանջում պահակը: Չգիտես ինչու, նա համոզված էր, որ կալանավորները փախուստ կարող են կատարել հենց հանգստի ժամին և ոչ թե աշխատելու ընթացքում: Մի քանիսն ուզում էին շարունակել իրենց գործն առանց հանգստի, որպեսզի ստանային «մեծ պայք», բայց պահակն արգելեց. — եկեք բոլորդ այստեղ...

Ճամբարից եկավ մի կալանավոր, բերեց «ճաշը»: Այդպես էր անվանվում կարտոֆիլե խորսիկով հիսունգրամանոց կարկանդակը: Ստացան, իհարկե, ոչ բոլորը, այլ նրանք, ովքեր երեկ չէ մյուս օրը գերակատարել էին իրենց նորման:

Ուտելուց հետո ցանկություն առաջացավ ծխելու: Ծխախոտ ունեին միայն մի քանիսը: Փաթաթեցին և նրանցից մեկը խնդրեց պահակին. — թույլ տվեք կպցնել:

Պահակն իր ծխախոտը դրեց մի կոճղի վրա և քաշվեց հեռու: Բանտարկյալը մոտեցավ, կպցրեց, հեռացավ: Պահակը մոտեցավ, վերցրեց իր ծխախոտը, նայեց ուշադիր, թե արդյոք դրա հետ որևէ վնասարարություն չկատարե՞ց կալանավորը: Չնկատելով դիվերսիայի որևէ հետք, դրեց բերանը, շարունակեց ծխել:

Իզնատ Իլիչ Իզնատովը, որին կալանավորները կրճատ կերպով անվանում էին «Իիի», ոչ կարկանդակ ստացավ և ոչ էլ ծխախոտ ուներ ծխելու, թեև դեմ չէր ոչ մեկին, ոչ մյուսին: Զրկված լինելով մարմնական այդ բավականություններից, նա զբաղվեց հոգեկանով, փորձեց հիանալ անտառով:

Նրանք նստած էին ոչ թե բացատում, այլ ծառերի տակ: Ամառվա շոգ կեսօր էր, դրա համար էլ կալանավորները պատսպարվել էին ստվերի մեջ: Սաղարթների ծածկը նրանց գլխավերևում այնքան խիտ էր ու համատարած, որ գետնի վրա ընկել էին արևի միայն մանրիկ, ցանցառ բծեր: Միանգամայն հասկանալի է, որ այնտեղ չէր աճում ոչ մի թուփ, ոչ մի սեզ: Գետինն այդտեղ նման էր մաքուր ավազաքարի և վրան հին փշատերևների փափուկ գորգ փռած հատակի:

Այդպիսի անտառը, անշուշտ, ունի իր յուրատեսակ գեղեցկությունը: Բայց «Իիի»ն չկարողացավ զմայլվել դրանով: Տիպիկ համեստություն. նրան թվաց, դա այն բանտախուցն է, որտեղ նա նստել էր մի տարի՝ նախքան դատապարտվելը: Բանտախուցն ամբողջովին ցածր էր գետնի մակերեսից և իր լույսն ստանում էր պատերի ամենաբարձրում, առաստաղի տակ բաց արված կարճ ու մանրիկ լուսամուտներից: Արևի լույսն այնտեղից ընկնում էր ճիշտ այդպես՝ հեռվից եկած և ժլատ...

Ահա արևի այս բիծը համեմատաբար մեծ է և երկարավուն, ճիշտ և ճիշտ ինչպես «մեծ պայքի» կարկանդակը... Իսկ սա փոքր է ու երկարավուն՝ ինչպես մոդես: Մոդեսի մարմինը

թեքշերտավոր է: Դա փշատերևներն են: Իսկ այս մի բիծը բոլորովին փոքր է ու կլոր՝ ինչպես միկոպեկանոց դրամ, միայն թե շատ ավելի մուգ: Այնքան է նման, որ թվում է, թե վրան երևում է նույնիսկ թվանշանը...

Իգնատն ականայից երկարեց ձեռքը և... վերցրեց այդտեղ ընկած միկոպեկանոց...

— Միկոպեկանոց... — բացականչեց նա՝ ծայր աստիճան գարմացած և ուրախացած — Գտա... Հենց նոր...

Բոլորը ծիծաղեցին նրա վրա, հայիոյեցին, անվանեցին հիմար, ապուշ, և, իհարկե, «Իիի»...

Իգնատը, առանց նրանց վրա ուշադրություն դարձնելու, շուռումուռ տվեց կոպեկը, սկսեց զննել: Վաղուց էր դա ընկած եղել այդտեղ, պարզ էր: Կոպեկն ամբողջապես պատած էր ժանգի մուգ, համարյա սև փառով, որի տակից, սակայն, հստակ երևում էին տառերն ու թվերը. 1 կոպեկ, 1937:

Ո՞վ կարող էր կորցրած լինել իր կոպեկն այդտեղ... Անտառը կուսական էր, բրիգադը գուցե մարդկանց առաջին խումբն էր, որ ոտք էր դրել այդ կողմերում: Բայց երկնքից հո չէ՞ր ընկել այդ կոպեկը՝ անձրևի կամ արևի հետ: Նշանակում է կորցրել էր որևէ մեկը՝ մի, երկու կամ երեք տարի առաջ: Եվ կոպեկը, փոխանակ անցնելու մարդկանց աշխարհում ձեռքից ձեռք, փոխանակ մերթափառ հանգստանալու դրամարկոյների փայլուն արկոյներում կամ փողամանների հաճելի փափկության մեջ՝ իր նման ուրիշ կոպեկների, տասրկոպեկանոցների, ռուբլիների կողքին, ընկել էր այդտեղ՝ սևանալու և ընդմիշտ կորչելու համար...

«Այ քեզ երջանկություն, այ քեզ երջանկություն»... — մտածում էր Իգնատը՝ անդադար հրճվելով կոպեկի փոխարեն, կոպեկի համար: Գտնվեց... Այն էլ ինչպիսի՜ հրաշքով... Իսկական հրաշք: Ախր Իգնատն սկզբում ուզում էր նստել մի ուրիշ տեղ, ավելի ստվերոտ, բայց այն տեղը գրավեցին ուրիշները, և նա ստիպվեց նստել այստեղ: Եվ բոլորովին պատահաբար նայեց այդ կողմ...

Կոպեկը կարող էր ծածկվված լինել փշատերևներով, կարող էր նաև բաց լինել, բայց գտնվել ոչ թե արևի տակ, այլ ստվերում: Եվ Իգնատը չէր նկատի այն: Անհնար, անհավատալի բան է դա, որ հսկայական տայգայում գառ նստես հենց այդտեղ, կոպեկի կողքին, և փշատերևների, թափթփված ճյուղերի ու հազար տեսակ այլ աղբի մեջ գտնես կոպեկը...

Իգնատի մատները դողացին: Նա վախեցավ, թե կարող է վար նետել կոպեկը և չգտնել այլևս: Բռնեց ավելի ամուր, նույնիսկ սեղմեց: Ո՛չ, նա այլևս չի կորցնի, երբեք, քանի որ այդպիսի հրաշքով գտնվեց...

— Վեր կացեք աշխատանքի, — հրահանգեց պահակը՝ դեն նետելով ծխախոտի մնացորդը:

Այդ օրվա երկրորդ կեսն Իգնատի համար անցավ սովորականից հեշտ: Նա ուրախ էր, համարյա երջանիկ: Շուտշուտ ընդհատում էր աշխատանքը, վախեցած շոշափում ծոցագրպանը. — տե՛ղն է արդյոք կոպեկը: Ախր, նա այնքան փոքր է և աննկատելի, որ կարող է կորչել, և չես էլ իմանա, թե ուր չքացավ:

Բայց կոպեկն իր տեղումն էր, նրա ծոցագրպանում, սրտի մոտ:

Վերադառնալով ճամբար և հագիվ ընթրելով, նա ելավ բակ և սկսեց փնտրել մի այնպիսի բան, որին քսելով, կարողանար մաքրել ժանգը կոպեկի վրայից:

Սպիտակ գիշերներ էին, լույսն այնքան ուժեղ էր, որ կարելի էր լրագիր կարդալ, եթե, իհարկե, նույնպես հրաշքով, ճարվեր լրագիր:

Իգնատն սկսեց փնտրել: Քարի կտոր անգամ չկար ճամբարում, ինչպես և չկար դրա շուրջը՝ անտառում ոչ մի տեղ: Ձանազան կողմերում շաղ էին եկել երբևէ այդտեղ գոյություն ունեցած ծառերի կոճղերը, բայց ինչի՞ էին պետք դրանք: Փայտը լիքն էր ամեն կողմ, բարաքներն ու դրանց քնելատեղերն ամբողջովին փայտից էին: Մի՞թե կարելի էր փայտով մաքրել մետաղը:

«Հիմար,— բացականչեց նա հանկարծ մտքում, իր հասցեին,— իսկ աղյուսնե՞րը»...

Նա ներս վազեց բարաք, որտեղ, բարեբախտաբար, ոչ ոք չկար: Տաք երեկո էր, բոլորը դրսումն էին: Հանելով գրպանից կոպեկը, սկսեց զգուշությամբ քսել երկաթե վառարանի հիմքի աղյուսներին...

Երբ սևության տակից երևաց մետաղի ոսկեղեղին գույնի առաջին բիծը, Իգնատը շողաց ուրախությունից՝ ճիշտ այդ գույնի նման: Ժանգը չէր քայքայել մետաղը, այլ միայն երեսանց էր պատել այն...

Իգնատը քսում էր կոպեկն աղյուսներին, քսում, և նայում էր շուտշուտ՝ չի՞ փչացնում արդյոք:

Շուտով կոպեկը փայլեց ամբողջովին, թեև, դրա վրա, տեղտեղ համառում էին գծիկներ և մանավանդ կետեր՝ տառերի ու թվանշանների անկյուններում թաքնված:

«Պետք է ասեղով մաքրել»,— եզրակացրեց Իգնատը:

Բայց ամբողջ ճամբարում ասեղ ուներ միայն մի բանտարկյալ, մի անխիղճ նախկին կուլակ: Նա իր ասեղը շատ թանկ գնով վարձու էր տալիս կալանավորներին և լավ ապրում էր այդ ասեղի հաշվին: Հագուստի վերանորոգման արհեստանոցը ճամբարից դուրս էր, ասեղներն այնտեղ առավոտյան տալիս էին հաշվով և երեկոյան էլ հաշվով վերցնում, որպեսզի ոչ մի ասեղ չմտնի ճամբար: Քրեականները շատ էին և նրանք սիրում էին տառեր ու նկարներ դաջել իրենց մարմնի վրա:

Կուլակը, որն աշխատում էր այդտեղ, հաջողեցրել էր մի անգամ խառնել հաշիվը և պահել իր համար մի ասեղ, որը դարձել էր այժմ նրա բարեկեցության աղբյուրը: Շատ բանտարկյալներ իրենց հագուստը չէին վստահում տալ արհեստանոցին վերանորոգման, որովհետև այնտեղից հաճախ ետ էին ստանում ոչ թե իրենցը, այլ ավելի վատերը: Ուստի և, վարձելով ասեղը կուլակից, նրանք իրենք էին կատարում վերանորոգումը: Իհարկե, թելը նույնպես գնելով նույն կուլակից:

Իգնատը գնաց նրա մոտ: Ասեղն այնտեղ չէր, վերցրել էին քրեականները: Նրանք վերցնում էին ձրի, ուստի և չէին յուրացնում, այլ միշտ վերադարձնում էին՝ ուրիշների համար: Կուլակն իր եկամուտներն ստանում էր միայն քաղաքականներից:

— Մի քիչ հետո կբերեն,— ասաց ասեղի տերը:— Եկ՝ վերցրու:

— Որքա՞ն պիտի վճարեմ:

— Կես պայոք հաց:

Իգնատն անմիջապես համաձայնվեց, թեև կես պայոքը՝ դա «կես կյանք» էր:

— Թեև ուզո՞ւմ ես: Կես պայոք էլ տուր՝ թեև կտամ...

— Թեև հարկավոր չէ, — ասելությամբ նայելով այդ «չախկալի» ազահ դեմքին, մերժեց Իգնատը:

Հետևյալ օրը, երբ աշխատանքի ժամին նա գրպանից հանեց կոպեկը և նայեց արևի տակ, այն փայլում էր միանգամայն նոր ու թարմ: Եվ եթե չլինե՞ր 1937 տարեթիվը, պիտի թվար, թե հենց նոր էր դուրս եկել դրամահատարանից:

Կոպեկը դարձավ Իգնատի մշտական զբաղմունքի առարկան, միակ բավականությունը նրա ողբերգական, անբովանդակ կյանքում:

Ամեն երեկո, երբ հոգնած կալանավորները քնում էին բարաքում, նա, իր տախտակի վրա պառկած, հանում էր գրպանից կոպեկը, բռնում աչքերի դիմաց և նայում: Երբ դեռ սպիտակ գիշերներ էին՝ նա նայում էր լուսամուտից թափանցող լույսի մեջ, իսկ երբ գիշերները դարձան մութ և բարաքներում սկսեցին վառել էլեկտրականություն, նա նայում էր դրա լույսի ներքո: Ավելի մոտ լինելու համար լամպին՝ նա իր ներքևի հարմար տեղը փոխեց վերին մի տախտակի հետ:

Իգնատի օրերն այժմ նման էին անընդհատ սպասման, թե երբ պիտի գա երեկոն: Նա սպասում էր դրան՝ ինչպես մի հաճելի հանդիպման:

Թվում էր, թե ի՞նչ կարող էր ասել կոպեկը մարդուն: Նայեցիր մի պահ՝ և այլևս ձանձրալի է շարունակել: Բայց Իգնատը նայում էր ու մտածում, և նրա մտքերը չունեին ոչ մի վերջ:

Որքա՞ն մարդ է աշխատել այդ կոպեկի վրա, — մտածում էր նա: Նախ՝ հանքափորները: Ոչ, նախ՝ երկրաբանները: Ոչ, ոչ, նախ՝ ինստիտուտները, որոնք պատրաստել են այդ երկրաբաններին... Գնացքներ, որոնք փոխադրել են հանքը... Գործարաններ, որ հալել են մետաղը... Դրամահատարան, որ կտրել է դրամը... Վերցնենք, օրինակ, այս մանրիկ տառերն ու թվանշանները: Ինչպիսի՜ հմտություն է պետք եղել սարքելու համար դրանց կադապարը կամ շտամպը... Կամ վերցնենք թեկուզ...

Մի ուրիշ անգամ Իգնատը պատկերացնում էր իր գտած ու մաքրած կոպեկն ուրիշ շատ կոպեկների հետ միասին: Կիսառնեւ և այլևս չես գտնի, — ինչպիսի՜ երջանկություն: Նույնպիսի կոպեկ՝ ինչպես բոլորը: Կմոտենա մի կին՝ զովացուցիչ ջրերի վաճառասեղանին, կհանի գրպանից չորս կոպեկ. — մի հատ երկուկոպեկանոց և երկու հատ միկոպեկանոցներ: Առանց ուշք դարձնելու, որ դրանցից մեկն Իգնատի գտած կոպեկն է, կտա վաճառորդուհուն:

Հետաքրքիր է, նրա մոտից այնուհետև ո՞ր կընկնի այդ կոպեկը... Հաջորդ երեկոն Իգնատը նվիրում էր իր կոպեկի հետագա ճանապարհորդությանը: Կոպեկը գնում էր նրանց տուն, ապա այնտեղից՝ խանութ, ապա՝ բանկ, ընկնում էր իրենց գործարանը՝ իր ընկերների ձեռքը: Նրանք դա թողնում էին լրագրի կրպակում, հետո այնտեղից, մի պատգամավորի գրպանում, նա գնում հասնում էր Մոսկվա...

Երբ նա այլևս անկարող էր լինում գսպել քունը, խնամքով դնում էր կոպեկն իր գրպանը, վրայից դնում լի լաթի կտոր, որպեսզի դուրս չսահի, և քնում էր: Նա միշտ վախենում էր, որ մի օր կքնի՝ կոպեկը ձեռքին, և կկորցնի: Բայց, բարեբախտաբար, չէր պատահում այդպիսի բան:

Դժբախտությունը եկավ բոլորովին անսպասելի կերպով և անսպասելի տեղում: Ասենք ինչո՞ւ անսպասելի: Հարկավոր էր լինել մի քիչ շրջահայաց, և կոպեկը չէր կորչի...

Ամեն անգամ, երբ կալանավորներին տանում էին բաղանիք, նրանց լողանալու ընթացքում հագուստները ենթարկում էին ախտահանության: Դա կատարվում էր շատ պրիմիտիվ ձևով: Վառվում էր մի վառարան: Դրա ետևում գտնվում էր մի փոքրիկ սենյակիսցիկ, առանց, իհարկե, լուսամտի, մութ: Հագուստները կախում էին այդտեղ և դուրս փակում: Ներսում գոյանում էր շատ տաք օդ, որից ոչնչանում էին ոջիլներն ու մյուս միջատները: Երբ կալանավորները դուրս էին գալիս լողարանից, նրանց ոտքերի մոտ շարտում էին հագուստների դեռ ջեռ կույտը: Չորս կողմից թափվելով դրանց վրա, ամեն մեկն սկսում էր ջոկոտել իրենը և երբեմն էլ ուրիշները՝ լավը, իր քրքրվածի փոխարեն:

Ոչ, Իգնատի վերնաշապիկն ուրիշը չյուրացրեց, դա անպետք վերնաշապիկ էր: Իգնատը հեշտությամբ գտավ դա և նախքան հագնելը, ձեռքը կոխեց դրա գրպանը:

Կոպեկը չկար...

— Կոպեկը... — բացականչեց նա բարձր:

Նորից ու նորից խառնեց գրպանը, հանեց լաթի կտորը, զննեց գրպանի անկյունները: Կոպեկը չկար...

Իգնատը նետվեց դեպի խցիկը, որի բաց դռնից փչում էր ջեռ օդը՝ ինչպես փոխի: Բայց նրան ետ պահեց ոչ թե տաքությունը, այլ մթությունը:

— Լուցկի, — բղավեց նա, — ո՞վ ունի լուցկի: Հաց կտամ փոխարենը: մի լուցկու դիմաց կես պայոք... Մի պայոք...

Բայց ոչ ոք լուցկի չունեւ:

— Ի՞նչ ես կորցրել, — հետաքրքրվեցին մի քանիսը:

— Կոպեկս...

Կարծեցին, թե խելագարվել է: Իսկ ոմանք՝ թե խորամանկություն է անում, ուրիշ, մեծ բան է կորցրել:

Իգնատը նետվեց խցիկ, մթության մեջ զույգ ձեռքերով շոշափեց գետինը, դուրս նետվեց միայն այն ժամանակ, երբ շնջահեղձ եղավ: Եկավ նաև հետևյալ օրը՝ բերելով լուցկի: Նայեց, փնտրեց, չգտավ: Ձննեց նաև հանդերձարանի հատակը: Նույնպես չգտավ:

Գուցե կորել էր ո՞չ այդտեղ, այլ անտառո՞ւմ... ճանապարհի՞ն...

Այն օրվանից հետո, անտառում գտնվելիս լինեւ, թե ճանապարհին, Իգնատն ուշադիր նայում էր իր ոտքերի տակ, կռանում և ստուգում էր ամեն մի կասկածելի առարկա: Ապա նորից, մի

քանի օրը մեկ, վազ էր տալիս Բաղանիք և նորից ու նորից փնտրում այնտեղ, մինչև որ մի անգամ նրան վնդեցին և պատվիրեցին այլևս չերևալ:

Կոպեկը կորել էր ընդմիջտ: Չէր կարելի հաշտվել դրա հետ, Բայց այդպես էր:

Կալանավորները շարունակ ծիծաղում էին «Իիի»-ի վրա, նրան համարում էին խելագար: Ավելի կարեկիցները, առանց ծիծաղելու, նրան առաջարկում էի ուրիշ կոպեկներ, երկու, տասը, քսան կոպեկանոցներ: Բայց նա մերժում էր:

Նրան հարկավոր էր այն կոպեկը, որը նա հրաշքով գտել էր տայգայի անսահման տարածության մեջ, խնամքով վերցրել էր, խնամքով մաքրել, սև ժանգի տակից նորից հանել էր ոսկեդեղին մետաղը...

Բայց այդ կոպեկը, հենց այդ կոպեկը, չկար: Տեսնես ո՞րտեղ էր ընկել նա այժմ՝ արդեն տակետակ ժանգ դառնալու ենթակա: Եվ այժմ դրա վրա դամբանագրի նման էին տառերն ու թվանշանները .

1 կոպեկ, 1937: